

Predstavnici opštine Kozarska Dubica juče su prezentovali mogućnost investiranja u poslovnu zonu "Lipova Greda" na konferenciji koja je organizovana u sjedištu Italijanskog instituta za vanjsku trgovinu (ICE) u Rimu. Konferencija je nosila naziv "Bosna i Hercegovina-ekonomske mogućnosti za italijanske kompanije", a opština Kozarska Dubica je jedina iz BiH koja je pozvana da prezentuje mogućnosti investiranja obzirom da je poslovna zona "Lipova Greda" ocjenjena kao najperspektivnija u BiH. Prema riječima Dragana Mataruge načelnika Odjeljenja za privredu i društvene djelatnosti konferencija je organizovana u saradnji ICE i Agencije za promociju inostranih investicija u BiH (FIPA). "Na konferenciji je bilo prisutno više od 150 učesnika, odnosno više od 100 italijanskih privrednika, te predstavnici ministarstava, bankarskog sektora i drugi. Nakon održane prezentacije organizovani su bilateralni sastanci sa svim zainteresovanim italijanskim privrednicima, na kojima su se mogli detaljnije informisati o svim prednostima koje opština Kozarska Dubica pruža potencijalnim investitorima", rekao je Mataruga i dodao da su se prisutnima obratili Raimondo de Cardona italijanski ambasador u BiH, Branko Kesić ambasador BiH u Italiji, Ana Trišić-Babić zamjenik ministra inostranih poslova BiH, Jelica Grujić direktor FIPE, Massimo Di Giandomenico direktor ureda ICE-a u Sarajevu, Giulio Moreno šef ureda Evropske banke za obnovu i razvoj u BiH i Orlando Fusco politički savjetnik Evropske delegacije u BiH. Mataruga je izrazio zadovoljstvo brojem prisutnih privrednika i kompletnom organizacijom. "Nakon prezentacije obavili smo nekoliko interesantnih razgovora iz kojih očekujemo posjetu italijanskih privrednika Kozarskoj Dubici i dalju realizaciju saradnje. Bila mi je čast prezentovati mogućnosti investiranja u opštinu Kozarska Dubica na jednoj ovakvoj konferenciji", rekao je Mataruga.

